

四庫全書

集部

欽定四庫全書

集部

石倉歷代詩選卷三百八  
四至

詳校官庶吉士臣龍廷槐

侍讀臣孫球覆勘

總校官進士臣朱鈐

校對官中書臣范來宗

謄錄監生臣楊元吉

欽定四庫全書

石倉歷代詩選卷三百四

明 曹學佺 編

明詩初集二十四

李德

神釋

大哉渾淪妙橐籥自無窮網緼一已構畀付出至公靈  
臺本無物而我處其中清虛為我體昭明為我庸倏去

入無間忽來歸寂空既作百骸長蔚為萬世宗母從衆  
形擾順適與天通

紫芝山房為湖廣鄭大叅賦

芝山何萋萋熠熠產靈秀美人慕園綺闢地敞雲構圖  
書資悅懌枯壑含昏晝佳氣藹川原和風散巖岫松蘿  
被廣蔭泉澗環清澈抱冲昔若遺理劇今豈後鍾英良  
有自瑞世非常覲明良共一時千載此其候

題陶淵明像

淵明節概士遠慕羲皇風榮名奚足道甘分固其窮得  
酒即為歡簞瓢常屢空朝出山澤遊暮歸衡宇中豪華  
非所貴但願歲時豐秋菊或盈園栖栖誰與同濁醪共  
斟酌日入會田翁此士不再得吾生焉所從

栖雲庵

石室凝紫烟空洞懸石乳陰崖含風泉終日灑飛雨臨  
流結精舍六月不知暑道人養清虛適與高僧處垢淨  
俱已忘孰為舍與取諸幻既遠離白雲日相與何當謝

時人來作塵外侶

孟夏五日感興

春陽舍我去四序無時停鬱鬱當軒柳珍禽時一鳴素  
琴寓我適濁酒陶我情顏鬢雖云改寸心有所憑偃仰  
東窗下聊以寄吾生

種麻

種麻滿東園種花亦盈畝麻生但芄芄華發映戶牖榮  
榮能幾時零落他人手豈如為締綌與君同永久向來

灼灼姿于今復何有

歲月徂遷未有歸止寓迹江漢懷抱索然時維

杪秋淒其締綌偶有所述用簡同志

杪秋氣方肅寒風動涼戶羈人未授衣適體寧捐故雲  
開漢臯路目送征鴻度山容欲受寒園芳已溥露故交  
久零落新知偶愜素時資益簪盍聊以慰遲暮

同詩社諸公遊白雲寺分韻得千字

捫蘿扣禪關長嘯青雲巔山開西北日水豁東南天涼

葉散虛席暝林啼清猿浮雲觸石起頃刻徧大千悟言  
造真適談空忘至言何當登絕頂俯視蒼蒼烟

留題郎步山莊

出門望南山山翳林木稠飛鳥欣有托吾生念歸休行  
行度前坂褰裳涉荒溝好風吹我懷禾黍亦盈疇人生  
衣食爾過此欲何求日夕返窮廬聊以忘吾憂

天上謠

玉樓瓊宇曉玲瓏雲輶電轂輾迴風自從羿射九日落



帝遣羲和御六龍六龍奔屬成今古海水生塵變桑土  
瀛洲花發幾番春誤殺秦皇并漢武桂宮珠露滴秋香  
仙仗徘徊朝紫皇鳳吹紛紛九成奏羽衣金節韻琳瑯  
金河流水連雲注織女牛郎在何處淋漓元氣浩茫茫  
白鶴千群駕烟霧女媧鍊石良可嗤此事荒唐奚足疑  
直憐世上人心改至理渾淪那得移

雜詩

人生更代謝闔闔為之機盛衰無常理生死乃其宜始

來本自無終性奚足悲擾擾依形立百歲以為期黽勉  
返吾初俟命復奚疑

送友回真定

君自邯鄲來復向邯鄲去邯鄲月色好夜照江南樹太  
行多峻阪中有羊腸路往來不憚煩知君為親故

暇日遊城西玄妙觀

還辭束帶累偶涉尋真路松吹度鈞天篆烟生細霧翩  
翩塵外侶杳杳雲中步儒道雖異途同歸在清素

仙人

瀛洲飛彩雲萬樹桃花春翩翩騎鳳侶恐是避秦人側  
窺渾淪妙幽探元化真徒令多欲者千古恨迷津

贈虛明道人

渾沌本無象表裏同一照古今若須臾羣真資衆妙五  
陰絕纖翳幽陽播靈耀王喬并羨門吾與爾同調

宿栖雲庵

衆壑忽已暝遠近響清湍山中對僧定疎雨掩柴關柳

暗猿狖集松交風露寒攬衣中夜起蘿月在巖端

閒居

北窗林影寂南湖水氣涼園荷始泛綠叢蘭漸吐芳撫  
節迹猶滯神閒機已忘無論喧與寂緬心即羲皇

憶南園

南園蝴蝶飛綠草迷行迹青鏡掃長蛾娟娟弄春碧錦  
屏千里夢寂寞愁芳色小字寫長箋鱗鴻坐相隔

亭亭水上渠

亭亭水上藻皎皎沼中藕花落子亦成色衰心不朽中  
藏千萬緒處汙恒自守不學楊花白隨風入窗牖

柳塘書舍圖

遠山出白雲近水明秋色烟波漫浩浩日暮歸舟急隱  
約叢薄間茆茨倚蒼石中有柳塘翁看看似相識

觀白鷺

河洲雙白鷺皎皎照清流所希在鮮食所願亦易酬朝  
飛浦澈曠暮宿林塘幽言採薇客吾與爾同遊

立秋日登漢陽朝宗樓懷鄉中諸友

湖山興不淺而我亦淹留得罪緣微祿懷君屬早秋  
淡雲鄉樹遠孤月旅情幽借問衡陽雁何時到廣州

濟南寄孫仲衍

南園虛夜月風景罷登臨輦洛成塵迹青齊入苦吟  
升沈凋壯節匡濟負初心薄宦容身得寧辭雪滿簪

金陵逢趙汪中

十年長契濶萬里各分飛岐路風烟杳江湖消息稀  
加

餐俱努力訪舊各沾衣春草無勞綠王孫自不歸

峽山寺

峽雲藏絕壁峽水積寒流寶樹籠香閣天花散彩樓梵音晴隱隱鐘韻晚悠悠聞道金仙宅飛來最上頭

寄孫典籍仲衍

南園草色參差綠忽憶佳人美如玉玉堂揮翰事已陳  
草屋懸燈照幽獨江湖狂客未言歸翹首東南淚濕衣  
何時淨拂青溪石與爾橫竿釣落暉

河陽月簡顏光宏

胡角啾啾悲石裂顏郎夜醉河陽月  
越姬颯沓舞秋風  
蘆筍含商玉情熱請看天上青雲道  
桂花落盡霜娥老  
離鸞怨鳳玉樓寒三尺青絲變秋草

燕歌行

秀頸紅脣臉花碧秋波湛湛傾人色  
高樓霧暖四時春  
蝴蝶飛來歸不得裾回縠轉春風催  
刻商按徵雲徘徊  
鳴鐘敲鼓玉山頽詎識樂極生悲哀



青樓曲

青樓春酣鸚鵡杯孔雀屏風錦繡開銀鸞玉鳳嬌未歇  
楊柳斜飛舞回雪越娘含醉弄絲桐十纖宛恨哀絃中  
調成白雪惱芳容長卿茂陵鬢如蓬

房中思

金井烏啼風撼撼桂樹團團江月白洞房秋思滿嬌娥  
淚滴珊瑚眠不得玉臺塵鑑少光輝髣髴孤鸞彩翼垂  
蓮枯蕙折無人惜露濕綺疏生網絲

春興六首

萬里春風二月花十年塵土一烏紗  
惟將素節酬知己  
豈有黃金買歲華  
愁邊熟食無烟火  
江上堅城有鼓笳  
憶我舊遊如昨日  
繡簾青舫越天涯

終南山色翠含烟  
太白峰高尺五天  
春暖鶯花連萬室  
月明笙鶴會羣仙  
黃塵白髮三千里  
流水浮雲十二年  
齊楚飄零成潦倒  
令人猶自憶秦川

洛陽城裏雪初消  
流水天津尚有橋  
漢寢隋陵春寂寞

龍門伊闕晚岩堯相如完璧無遺恨王子吹笙擬見招  
為報山人休索價可能容我伴漁樵

日射天門萬象新繡衣朱履侍楓宸雲移仙仗千官肅  
日映龍顏四海春金碗玉漿來內侍紫泥丹詔下王人  
十年趨走金陵道到老低垂漢水濱

漢水東流日向西孤村烟樹鷓鴣啼纖纖岸草迎人眼  
踏踏江花映馬蹄有客問奇仍載酒故人相過輒留題  
暮年正爾逢知己布襪青鞋信杖藜

江漢飄零今六載故園迢遞尚三千  
新春隱几看雲坐  
遙夜懸燈聽雨眠  
彭澤官貧差有酒  
杜陵身老未歸田  
桃花流水深千尺  
擬向溪頭理釣船

社後謾興

社燕西飛節物過  
年華世事兩蹉跎  
晴天白鳥來無數  
落日浮雲看漸多  
黃菊何人歸短棹  
紅蕖秋水淡澄波  
寂寥多恨憑誰遣  
搖落無心奈爾何

寄妻弟鄭子玉

年年留滯漢江頭  
華髮蕭蕭不奈秋  
夢斷鄉關猶是客  
望窮烟水更登樓  
西風鴻雁來芳信  
南紀親朋憶舊遊  
聞道菊松無恙在  
可能歸去覓菟裘

王彥舉南雄省親

神工剪水寒凝指  
南浦頽雲吹不起  
王郎氣酣走馬去  
三尺龍泉拂流水  
玉壺愁破酒如兵  
鶯管嗚嗚咽不鳴  
幽紅啼露香凝幕  
蜀錦縫衣寄君著  
象牀醉臥紫氍毹  
鳳簡封題草字書  
北樹南雲一千里  
願攜徑尺託雙魚

秋情

蠟炬搖紅紗隙凍沈香帳底鴛鴦夢芙蓉波冷薄霜凝  
一夜離鸞憶單鳳梧桐金井啼曙鴉夢郎封侯歸妾家  
開門自掃枇杷花

十二月樂章

正月

東方日出香茸茸長條短條花眼紅柔雲弱雨暗填空  
茫茫蝴蝶破春風鸞帕抹烟山夢濃蕭颯愁思開暝容

江頭溘溘水聲動微和着柳黃金重

二月

燕梁玄玉濕蜂蜜花房曉銅龍嚙水微翡翠含波小石  
間苔蝕菖蒲根古魂啾啾啼曉昏紅芳碧蘂亂殷殷蠻  
女剪烟插翠雲游絲縈春懸錦綺渚閒沙白鴛鴦喜

三月

花歛容柳刷翠扇薄欲裁紈佩香思剪蕙桐英寂寂沈  
寒波紛綠猗猗日影多六街烟花淨如掃千年古血生

青草

四月

碧雲屯午風熏熏五絲曲奏玄霜紋湘皋野龍拔新玉  
摧鱗健角蕭蕭綠蕙香小妓扇輕羅半掩櫻脣試新穀  
金丸落落絃紅脂石池青鈿溢碧漪

五月

沙上短蒲綠赤菱紫芡離披熟越奴青髮父懸香踏踏  
采蓮塘上曲游龍撇波海水飛黃頭伐鼓吹參差少年



搖曳淡忘歸

六月

皇天高厚地裂白日河庭泣魚鼈湘神抱瑟愁波濤頽  
陽畢化穉陰結焉知海上黃金闕萬丈丹梯到寥泬喬  
松相攜弄白雪

七月

桐風刮帳無春溫赤精解綬佩金神銀浦橋成鵲濟津  
遙遙帝子度長雲野芳萋萋日杲杲十萬蛾眉鏡中老

錦樓折竹夜迎仙  
越秀吳都巧不眠

八月

玉露溥清虛銀雲擁明月空濛  
白夜涼遠近商聲發桂子落  
秋香寒娥能孤潔誰家理素琴  
調急絃應絕

九月

清颿激素商遠客生歸夢  
茱萸委匣香玉腕勝金重幽芳  
垂晚逕汲綆霜華凍洞庭木葉  
空臨水悲相送

十月

沈寒凝海霜斑斑蘆鴻叫叫蒼梧間仙雞警曉蟠桃乾  
天鼓無聲澤龍閒

十一月

軒轅玉管還初氣綵線紆迴報長至瑤花散落滿寥天  
萬戶千門夜明媚南山幽翠淨如削內屋紅爐春自若  
璿璣迴斡見天心姬氏騎龍班歲朔

十二月

北斗璇光射幽土四氣緣環若朝暮壑底驚蛇挽不留

官街力獸馱寒去

閏月

羸皇當極黃楊死一寸霜皮生不起  
嶧陽老榦青銅根  
玉葉排秋十三子鬱華羿妃緩兩轡  
遲回二萬八十二  
春秋九十短長勻青紅白黑上下均  
千秋萬歲奉明君

出城

越王宮春風起何處散芳塵垂楊沙  
逕裏舞羅衣揮鳳  
尾鳴鸞簫發貝齒懷洞庭悲帝子海  
波竭彭鏗死義和

影如流水

梅花曲

軒后登天時騎龍乘紫雲三千宮貌附龍鱗瑤瑤月佩  
荷絲裊夜入羅浮醉仙子酒樓明月神貝水夢闌霜冷  
蛾眉死

送友人

關雲擲擲吹沙黃瑤華拂劍春風香鶯黃淺泛玻璃光  
越妓舞衫金縷長江津白白黃灣月神魚撇波龜甲裂

湘娥疑綠染春衣踏踏青雲郎馬歸

對鸚鵡洲

芳洲采杜蘅日夕春水生不特嗟鸚鵡深令憶禰衡因  
悲才勝者祇使寸心驚

塘上行

露濕藕花香花折藕絲長豈無鳬與雁不似錦鴛鴦

題扇

涼風吹動影蛾池百頃秋波漾素輝十二玉欄閒倚徧

桂花清露濕人衣

石倉歷代詩選卷三百四



欽定四庫全書

石倉歷代詩選卷三百五

明 曹學佺 編

明詩初集二十五

管訥

素堂

湘水之涘衡山之陽有美一人於焉構堂維椳維桷匪  
雕匪斲不尚其華迺欲其朴堂之翼翼人之諄諄匪謀

自適爰以養親于時興止于時甘旨朝夕弗違惟親之  
喜委順在天窮達是宜居易而行心毋外馳奢則蠱情  
儉以養德用戒後昆服之無斁

白馬篇

白馬行且嘶玉勒錦障泥揚鞭羽林郎宿衛通金閨一  
朝赴邊急轉戰玉關西長戈揮白日高旌卷彩霓驅山  
填火井累石起雲梯烽舉星芒亂弓開月影低分符降  
赤勒飛箭定叫黎功許韓彭竝名與衛霍齊主恩諒可

報國難詎難擠孰甘局鄉邑門巷閉蒿藜

遠遊篇

御風日萬里逍遙登遠遊竦身青冥表瞬息四顧周目  
力隘八極壯志局九州泰山小封垤滄海渺浮漚俯視  
瀕洞間萬彙等蜉蝣浩歌挾洪岨長嘯訪浮丘迴颿欵  
闔闔謁帝十二樓酌我紫霞觴遺我青鳳裘授以長生  
訣歷劫三千秋從茲謝流俗大塊同悠悠

少小從行伍二首

少小從行伍而今作飲徒博錢尋劇孟買劍問風胡結  
伴軍中戲嗔人醉後扶黃金三萬鎰誓娶陸家姑  
少小從行伍千金辦武裝日騎官廐馬夜宿酒家娼知  
已寧論死臨危肯畏強蠻夷知姓字不敢犯封疆

銅爵妓

銅爵高臺上西陵古墓邊君恩徒自重妾貌竟誰憐羞  
掩歌時扇愁登舞後筵惟餘漳浦月三五夜空圓

二隱圖

溪上放舟迴山中負薪暇一笑偶相逢於焉遂清話寧  
知有秦晉況復論王霸回首總忘機青山夕陽下

星夕

牛渚清且淺鵲橋西復東黃姑仙駕動天女錦機空別  
淚零清露離魂慘驚風如何一水隔一會一匆匆

秋夜

不寐耿長夜攬衣徒歔歔陰蟲吟近砌涼颿動踈幃素  
抱殊未釋清懽念多違豈惟南飛鵲茲夕無所依

寫懷

朝迴憇公館殘陽坐來暝  
踈雨過高林華月出東嶺  
流光晨復晡朱顏豈吾永  
故國歸何時悠然發深省

病後喜雨謝同寅紀善貝季翔見過

夜月忽離畢今晨雨滂沱  
秋聲落庭樹水氣沒池荷  
豈云三伏中感此涼意多  
神清體自適頓然釋煩疴  
明當謁公館仰謝數經過

曉起

真館曉晴初官清遠塵俗怡然對簡編庶矣忘榮辱還  
峰擁歸雲高城淡微旭落盡凍青花江南雨新足

遊寶林寺

金碧絢樓臺禪關向此開水分雙澗出雲擁萬峰來古  
佛遺香火殘僧話刳灰黃塵吾老矣何幸一徘徊

獨坐

獨坐茅堂上長吟不下牀亂書堆几席踈雨過陂塘野  
燕衝簾入河花度水香應須存晚計次第學耕桑

答友人雨中見寄

雨聲連曉夕牢落閉幽扉  
屋漏頻移榻江寒更覓衣  
野鳥飢自下水鳥濕還飛  
爾亦遺榮者終同理釣機

郊居

春城俯平野草色靜柴門  
魚蟹舟中市桑麻屋後村  
遣兒招社飲為客置盤飧  
老計能如此陶然付一尊

贈洪山龍門海禪師侍者真淨

祝髮名真淨從今淨已真  
誦經當作佛持律定過人  
江



月空中夜山花物外春龍門多寶藏種種是奇珍

送宗師還玉泉寺

省師何處去古寺玉泉清山笠披雲過江船趁月行拈  
香叅祖塔乞食到王城此去傳心印應知道可成

夢遊洪山寺

不到東巖閣重來又一年無緣能離俗有夢只棲禪客  
坐茶香裏僧行竹影邊夕陽天未晚幽思滿歸羈

齊居直館

直館齋居夜心無一慮  
縈茶烟籠燭暗花月進窗明  
老去頭雖白官閒夢亦清  
明朝當署祝早起候宮城

雪谷為武昌奚瑄賦

空谷幽人意閒雲靜者心  
石圍花下奕泉答竹間琴  
鶴影蒼巖遠雞聲碧樹深  
雖云住城市何異在山林

題蔡用強石城山房

絕境羣峰合幽居一徑分  
巖花和雨落林鳥隔雲聞  
門熟呼猿果書香辟蠹芸  
不因徵召起終是遠人羣

過烏沙夾答諸僚友

曉過烏沙夾秋風萬斛舟青天雲際雁白浪水中鷗兄  
弟皆良會江山足勝遊行行紅日近佳氣藹皇州

出都門

天上還家日沙邊解纜時亂山含宿翠飛鳥戲晴絲野  
眺偏宜遠江行不厭遲正期遊汗漫何幸值雍熙

發新河次韻

自忝王門祿頻年此地過秋風迴遠道暮雨宿新河白

浪鷗邊小青山雁外多客杯相慰藉一酌總恩波

迴從經陽邏

陽邏行將近淘金過淺灘草痕秋更碧江氣晚逾寒處  
世情尤拙還家跡易安客愁雖似海未敵酒杯寬

舟中寫示蕭雷二伴讀

拜秩辭京國揚帆放使舟微茫烟外樹浩蕩雨中鷗詩  
美青山對杯空采石謀應將柁樓興一望楚天秋

曉發雷港

月暗投寒港天明發曉途  
鷺應尋宿侶雁已誤更奴霞  
暎沿汀蓼霜枯倚岼蘆彭郎磯  
尚遠隱隱一山孤

題伴讀董時貢所藏山水

公館多清暇林泉愜所探  
人家如谷口風景似江南  
斷逕荒深蘚崩崖老巨楠  
鯨波通海去鳥道與雲叅  
江艇維晨渚巖扉掩暮嵐  
雨田收赤黍霜圃摘黃柑  
未染清霜屋先尋白石庵  
醉來休荷鋤老去願投簪  
許我閒身在從渠俗慮耽  
偶然忘世累聊復謝林慚

和吳教授過潯陽

三旬辭幕府千里歷星霜水鶴和鳴  
勝風鳥逐去檣還家趨鄂渚歸路過潯陽  
山立雙峰峭江分九派長雲泉高噴薄  
烟樹遠微茫箬葉寒仍綠蓀花晚自芳  
守臣甘狗國遷客重離鄉簡冊遺風節  
琵琶斷淚行濕嵐郵傳外冷月戍樓旁  
老境頻過此懷賢易感傷

九月廿五日值余初度諸友以詩酒見壽於舟  
中賦五言長律一首以謝云

老去逢初度那知在客邊清歡當此日嘉會勝常年古  
鼎名香爇高臺絳燭然仙庖能具饌官舫盛張筵新果  
登盤美佳殽入筯鮮慶行承綵帕壽祝荷華篇北斗長  
生外南山爛醉前交情何鄭重禮貌極周旋一府官僚  
盛千秋國主賢願同金石志永以保貞堅

永嘉裴季和家有竹居典簿中都國學種竹數  
竿想像故國之意

客舍仍藏竹殷勤憶故園亂枝交窄徑輕篠拂卑垣曙

色烟凝几秋聲月在門殺青編汗簡浮碧注山尊斷筍  
供春祀行庖具夕飡高人頻駐屐俗士竟迴轅雖與山  
林遠終無市井喧晉賢名未泯唐逸興猶存髣髴龜山  
路依稀雁蕩村南歸遂幽息投老更何論

墨窗為越人趙撝謙賦

女媧立極斷鼇足羲畫之先無刻木始觀鳥跡製文字  
夜鬼哭天天雨粟篆隸變化生八分行草復作何紛紛  
六書古制既茫昧載籍況遭秦火焚後之作者不可數



形聲寥寥渺千古更論得法神妙間自信臨池心獨苦  
君居於越文獻邦家藏金石書滿窗磨穿青州老未已  
萬斛巨鼎疇能扛吳興宗人已物故淞河東西誰獨步  
君今有志繼絕學砥柱中流見孤注剡溪百番冰雪光  
玄霞一斗松煤香滿堂賓客看揮灑風雨颯颯龍鸞翔  
我嗟塗鴉手如棘屢欲從君問竒畫君還許我載酒來  
我捧千鍾勞君筆

尹母行

雲間尹母年十七嫁夫三年夫病卒舅姑在堂兒在襁  
自分乳乳守空室家貧何以為生理紉縫得錢奉甘旨  
門外春風自往來寒心一寸如灰死

題胡長史雪舟卷

萬里漫漫凍雲黑六花飄飄朔風急富春江頭行旅稀  
汀鳥沙禽飢不飛此時先生乘一舸擁鼻長吟篷底坐  
白鶴氅衣寒半披東西沿洄隨所之須臾雪深風轉大  
結纜歸來且高臥妻兒凍餓甘守貧升斗不思干故人

東方日出徵書下縣官扣門來勸駕

哀雁吟

隣有貞婦痛夫以刑死日夜號泣誓不再天余嘉  
其志為賦哀雁吟

哀雁復哀雁雄雌不相違三春北去秋南歸年年稻梁  
充汝肥汝肥曷已時安知矰繳不汝隨一朝弋雄孤其  
雌雌孤殊可傷夜夜啼秋霜楚天空濶雲水長誓不更  
逐羣侶翔花開滿春塘不愧鴛鴦與鴛

姚氏野春堂

野外茅堂不掩扉  
堂前風日散晴霏  
梨花門巷清明近  
春水池塘燕子飛  
每約鄰翁同社飲  
更從田畯勸農歸  
明朝我亦尋春去  
小試東風白苧衣

宴徐氏樓

高宴徐家池上樓  
座中賓客總風流  
東城美酒休辭醉  
南國佳人自解愁  
晴日遊絲當戶落  
暖風香篆近簾浮  
歸時不用山公馬  
短棹春波正滿洲

和內兄金士簾清明日答張應辰見過

雨晴江路少塵沙有客尋春到水涯  
風細遊絲低著草日斜歸鳥亂穿花  
青山幾處無新塚喬木何人是故家  
倩得盤遊春髻子東風日日好將車

山水便面

宣和便面何從得畫史當時屬有才  
紫翠峰巒天上落青紅樓閣樹頭開  
羣賢似向蘭亭會一老疑從栗里來  
安得從容隨杖屨輕舟日繫水雲隈

寄淞上友人

憶昔都門把臂時，殷勤索我送行詩。  
客邊賴爾能相慰，別後令人有所思。  
芳草暮雲愁忽忽，落花春雨鬢絲絲。  
東歸艇子如堪買，定擬尋君澱水湄。

送兄勉翁自鳳陽回淞

把酒燈前醉復傾，別離無限異鄉情。  
一身千里久為客，百歲幾時長見兄。  
春雨園廬青草遍，暮雲丘隴紫芝生。  
白頭遂我東轅日，數畝圭田得耦耕。

過洞庭

湖上東風水似天，渚花紅白共春妍。  
蒼梧二女墳前路，青草三閤廟下船。  
鮫室綃機聲軋軋，龍宮珠珮影娟娟。  
官閒更遂南遊興，借榻君山寺裏眠。

題王秉正雲林清隱

青林白谷水雲鄉，隱者深居一草堂。  
百道松泉當戶落，四時花雨入簾香。  
門前車馬紅塵遠，座上琴書白日長。  
滿目故家風景在，不須重畫輞川莊。

送長史司吏吳永中役滿還廣東

早春公館柳條黃  
清暇題詩送掾郎  
白髮簿書官事了  
青山風雨客程忙  
船從杜若芳洲發  
酒向枕榔小店嘗  
歸及墓田寒食後  
碧雲東望思茫茫

送寶曇應禪師遊峩眉回金陵

峩眉峰頂絕峻嶒  
不離塵凡不易登  
太古雪消丹壑裏  
普光天在白雲層  
神鐘日報齋頭飯  
聖火宵明佛殿燈  
六載下山非苦行  
怕人云是再來僧



和鶴年丁先生宿東巖韻兼呈洪山海禪師

借榻東巖第幾層  
山中王舍佛圖澄  
浮榮過眼寧非夢  
清苦前身本是僧  
齋罷雲扃時聽講  
詩成雪屋夜懸燈  
虎溪有約仍三笑  
自愧為官老未能

題修江王玠西山舊隱圖

君家舊隱知何處  
遙隔修江紫翠岑  
金碧畫圖聊慰藉  
烟霞丘壑此登臨  
水花凝露魚依渚  
山葉鳴風犬吠林  
布襪青鞋歸及早  
莫教猿鶴怨秋深

雙竹

玉立亭亭竝出林不於千畝競繁陰  
雲霄每引鳳凰下風雨或作蛟龍吟  
夷齊同隱高節在皇英對泣遺恨深  
何當分箇漁竿去獨釣渭川烟水潯

紙被

萬杵霜藤練色勻卷舒盈幅淨無塵  
梨花夜暖雲迷夢柳絮春寒雪滿身  
未恠青綾能見妬也勝白氎尚欺貧  
五更聽徹金門漏得似山林晏起人

木芙蓉

渚宮仙子耐清寒  
笑倚西風臉渥丹  
絳節三朝瓊作珮  
霓裳一曲翠為盤  
夜霜漁屋燈前見  
秋水人家畫裏看  
可惜繁華易惆悵  
錦官城上夕陽殘

月中桂

上界誰將此樹栽  
廣寒高處古香來  
根從天地分時種  
花在山河影裏開  
白兔守株依貝闕  
青鸞銜子下瑤臺  
不知斫盡吳剛斧  
天上浮雲變幾回

燈花

不假天工雨露栽銀缸火暖自然開  
雨莖朱草含烟秀一朶紅雲度水來  
春色半浮珠蓓蕾風情中結錦胚胎  
明朝喜事殷殷報莫遣芳心一寸灰

松窗聽雨為西安楊公圭賦

草堂千箇種長松好雨時來紫閣峰  
聲到風枝驚睡鶴勢迴雲壑起潛龍  
暮樵隣父歸應濕晨汲家僮出更慵  
且喜官閒清兩耳逢人莫說大夫封

黃鶴樓

黃鶴西飛去不回青山高棟自崔嵬當年賣酒人何在  
今日題詩客又來舟繫城邊官柳發笛吹江上野梅開  
白雲只在闌干外安得乘之遍九埃

北榭

舊家行樂小亭臺珠箔青山罨畫開花月當時人已散  
柳風今日燕還來舞鈿猶委宮牆草步障曾過輦路苔  
一代繁華易銷歇白榆霜冷雁聲哀

呂仙亭

道人高坐朗吟亭古蹟因知此地靈  
劍氣飛來湘水白  
笛聲吹入楚山青  
階前丹棗何年熟  
枕上黃粱幾日醒  
快我登臨塵事隔  
摩挲蒼蘚讀碑銘

辛未初度和李翔見壽

日華初上萬年枝  
官滿雄藩未許辭  
初度今朝猶是客  
老來多累又添兒  
黃花醉我留連酒  
白雪驚人唱和詩  
珍重同袍交契在  
十年何日共襟期

陸氏滄浪漁隱

子是天隨幾葉孫家藏釣具至今存秋風鱸美時供饌  
春水鷗閒日到門泛宅豈殊居甫里放舟莫擬入桃源  
濯纓濯足都休論且對青山倒一尊

送監生馬駿赴京

黃鶴磯頭上驛船柁樓撾鼓下晴川客行二月梨花後  
人別東風燕子前

伴讀周庠求題其師叙南遊克成先生雙溪草

堂

聞道雙溪似瀼西  
草堂小築足幽棲  
揚雄奇字知誰問  
杜甫新詩漫自題  
滿座荷風魚躍浪  
一簾花雨燕爭泥  
白頭無意蒲輪召  
只恐文光動壁奎

脩竹芙蓉

水仙小隊自成雙  
裊裊霓旌引翠幢  
一夜湘君頭盡白  
西風離思滿秋江

題玄真詩意圖



千峰雲氣涌如泉  
遠樹微茫斷復連  
祇有大夫橋下路  
青山都屬釣魚船

墨桃花

武陵仙子絳綃裳  
愛向春風試艷妝  
一自別來顏色改  
不堪憔悴見劉郎

贈別

草色青青漢水新  
異鄉聽雨怕逢春  
客懷最是今年惡  
頻向東風送故人

書松雪翁墨蹟後

吳興翰墨人間少  
白璧黃金價盡低  
今日鷗波亭下路  
王孫何處草萋萋

詠菊

越娘初試素羅裳  
愛向秋風學靚妝  
一夜不勝瓊佩冷  
晚香亭館有新霜

紀夢

小宴初闌罷玉笙  
東風庭院好春情  
流鶯啼過樓東去

一樹梨花正晚晴

京口懷季翔

官柳烏啼曙色催  
滿衣風露早朝回  
歸期想在重陽後  
為報黃花緩緩開

和鶴年先生訪補衲和尚詩

半霄峰頂擁丹霞  
兩策登扳豈憚賒  
老衲倒穿迎戶外  
山禽啼上石楠花

雲林先生小景為李至剛叅議題

故叅池館錫山阿門逕寧容俗士過清閼閣空詩社散  
蛛絲窗戶落花多

題奚瑄雲山佳處

羣峰競秀遶儂家流水當門石逕斜閉戶不知春已去  
白雲滿地落松花

題畫

柴門春盡動鷗波樹色山光雨後多老去無官長自在  
醉眠江閣聽漁歌



石倉歷代詩選卷三百五

欽定四庫全書

石倉歷代詩選卷三百六

明 曹學佺 編

明詩初集二十六

劉炳

崩城操

朝從城上哭長城與雲齊暮從城下哭長城化為泥嗚呼城已崩兮猶可築夫若死兮身可續妾寧化魚溜水

底立廟祀君君血食

石婦操

朝朝山頭望日日顧夫歸夫君不歸將疇依妾身已一  
難再失寧向山頭化為石山崩石應墮江水千年萬年  
清到底

邯鄲行

白日下藜臺野曠秋風早不聞歌吹聲空遺往來道傷  
心却憶平原君墓上牛羊踏荒草



寒夜怨

月來愁亦來  
心憐月去愁  
應改樓高月  
轉遲停筍坐倚  
熏籠待月落  
却成眠誰知  
枕冷愁仍在

烏栖

烏夜啼  
梧桐樹  
愁夢回腸應苦  
蘭膏張照樹光啼  
烏去夜未央  
梧桐葉底清露墜  
一聲一滴相思淚

燕子樓同周伯寧賦

寶瑟凝歌繞珠箔  
流蘇結帶黃金索  
翠紅香裏宿鴛鴦

春風人間無此樂  
杏梁塵暗麝蘭篝  
黛鎖眉峰掩畫樓  
燈殘枕冷梨雲斷  
秋雨人間無此愁

桃葉青

桃葉青青杏花吐  
樓頭吹笙教鸚鵡  
紅牙象版按梁州  
金縷衣裳美人舞  
離情不似月常圓  
桃葉青青似去年  
美人不來鸚鵡怨  
杏花零落盡樓前

雙桐生空井

井上雙梧桐  
秋風易搖落  
綠葉墮鳴璫  
清陰捲重幄  
紋

甃生旅葵銀瓶響空索疏枝覆烏臺交柯臨鳳閣美人  
矜容儀照影傷今昨鉛華逐波逝歡賞隨年薄行客攀  
轆轤哀聲隔簾箔

明妃曲

胭脂馬雕鷹旗孤裘蒙茸金絡羈白玉作鞭雙袖垂手  
抱琵琶紅淚滋黛雲點鬢顏如玉春嬌學得蛾眉綠自  
擬將身寵漢宮誰憐薄命歸殊俗窮陰絕漠易悲辛落  
日哀笳處處聞嚴霜夜鎖關頭月朔氣寒飛磧裏雲鴻

雁蔽天斜作字駱駝連塞動成羣漢家君臣亦良苦却  
將嬌比烏孫主廟堂肉食列重裯汗簡如何照今古妾  
身分得君王憂萬死邊塵心亦休腸斷年年邊地夢心  
懸日日漢宮愁百年一身何足道妾容不似花容好漢  
家三十六宮春傾國傾城更有人君王故殺毛延壽特  
遣單于貴妾身

鬼妾行

閨中女兒白於雪縣官娶作專房妾黃金翠羽繡羅襦

枕邊誓死心不渝豈憶榮華草頭露好似青藤倚枯樹  
一朝樹倒藤無依垂垂哀哭牽腸肚依稀無復半年春  
新官到任遣媒人鴛鴦錦帳重還整鸞鳳金釵依舊新  
洞房更結叮嚀語却說新情多勝故自忿飛花逐水流  
為憐嬌蝶無鶯妬傷心認著主衣裳窗前臨鏡照新妝  
青銅欲待銷磨盡幾度春風幾斷腸

蘇小小歌同端孝思賦

棠梨花開春日遲綠窗銀屏鸚鵡啼玉驄慣識尋芳路

手綰同心約郎去

行路難

奉君五綵鳳凰之綺幄七寶鴛鴦之錦牀博山氤氲之  
冰屑金盤沆瀣之瓊漿春風無情不相待朱顏綠鬢年  
年改姑蘇臺上鼓如雷四時歌舞百花開當年意氣今  
安在鬼火如燈秋似海

董嬌嬈為周郁賦

妾家住邯鄲少小矜容顏七歲畫蛾眉十歲垂髻鬟十

三刺繡人前坐十五秦箏架上彈紅粉樓高臨大路自  
恃芳年立門戶鸚鵡春眠芍藥闌驕晚繫垂楊樹梅  
點香奩玉作鈿蓮移羅襪金為步朝歌暮飲綺羅叢東  
園桃李鬪春風黛凝柳淺朝勻翠朱訝櫻濃曉洗紅燭  
圍錦帳宵常曙香藹雕籠夕未空秋月春花等閒度誰  
憐窈窕近新故夜夜虛迷洛浦雲朝朝枉結陽臺雨帶  
綰同心只自憐枕期連理翻成誤眼前相愛豈相知彈  
指風光節物移只道青春鎮長好那知白髮易如絲容

顏銷歇鶯花冷歌舞淒涼鞍馬稀昨日樽前雙泪落誰  
似周郎情不薄得配鴛鴦死亦判願諧魚水生相托青  
鳥緘封書莫遲秦樓腸斷夜烏啼君卿豈羨東牆約梁  
氏應同舉案齊

長相思 高啟同賦

唱歌別君酌君酒出門不道離家久一日三時聽馬嘶  
陌頭又見青青柳曉日遊絲墮粉牆閨中啼鳥人斷腸  
鸞巾粉浥新年淚鳳枕情遺舊日香比翼鬢雲長自愛



合歡眉黛為誰妝  
經春魚雁無音信  
落花風急愁成陣  
走馬常提白玉鞭  
封侯何用黃金印  
昨夜銀缸粲作花  
定是行人當到家  
玉壺瀉香紅燭煖  
雞啼一聲嫌夜短  
瓊姬墓宋仲珩同賦

野花凝粉鈿瓊姬醉時面  
夕露柳絲長瓊姬晚黛妝  
行人墳上莫回首  
一顧春風一斷腸

秋夜詞

銀牀露滴梧桐葉  
紫殿香銷水沉屑  
玉簫吹罷晚妝殘

半搭珠簾拜新月

金殿人稀瑣窗綠輦路紅蘭遞秋馥生憎月傍玉堦明  
芙蓉花裏雙鴛宿

田家樂寄張師孟

田家樂今年庄農好秋作蟄龍蛻骨枯棹懸五穀咸登  
時雨若官家更憂民力疲公田折布能輕齎小姑攜筐懶  
梳洗拾得綿花如雪肥大姑軋軋催機杼踈簾樹影寒  
蛩語鬢雲籠霧颺西風眉月生涼褪秋暑山徑牛羊下

夕墟蕭蕭榆柳草堂虛野老杖藜邀小酌諸孫燈火讀  
殘書

簡孔博士

宿雨曉還歇開窗消鬱沉烟光靄芳樹池上鳴幽禽逶  
迤瞻郡齋窈窕期盍簪孤懷屢百積羣疑思一箴何時  
聯夜榻春漏委波深

左掖門朝退呈吳待制諸公

謬忝金閨籍聯班趨晚朝逶迤西上門窈窕長安橋殘

雪帶遠樹夕陽在山腰不有同袍者疇能慰寂寥

別京邑之東阿

前年別鄉閭今年出京邑悠悠去江漢杳杳事行役所  
懼心志違況此風波急烏啼楓樹烟雁下蘆洲夕回首  
望長安蒼茫寸心失

春夕直左掖懷周侍御

晚雨池上晴逶迤淡將夕金莖華月生綺樹流雲濕窗  
虛漏聲永慢捲爐烟襲憶我同袍人何由共瑤席

憶園蘆

種園在東臯草荒瓜蔓長日落秋樹涼褰衣獨還往時  
逢野老憇自足田園賞沿溪暝忘歸古寺烟鐘響

經汝弼叔故館有感而作呈汝尚叔及彥常弟  
山館淡將夕寒燈對爐熏牆陰古梅落池深芳草踈  
櫺帶斜月連牀非昔人履綦無往跡琴冊有餘塵坐感  
歲時改心悲文采湮絨題不忍寫悽惻淚沾巾

題丁氏晚香卷

百草秋已謝佳菊獨含姿涼颼動秋馥夕露敷寒蕤  
逶迤被三徑窈窕盈東籬誰憐幽貞操自托遲暮期持觴  
挹其秀靜使君子宜

經白將軍故第

粉牆將暖日依舊柳條新上馬臺邊路春風無一人  
畫梁暗巢雀綺席委芳塵桃李東園夜餘香斂翠頻

西平沐公輓詩

桓桓西平公虎臆如鍊色總戎領貔貅破敵撫蠻貊安

邊鎮藩省匡濟立勲策十年叅幕府深愧簪纓客酌酒  
瞻南雲悽其寸心折

胡叔直輓詩

清如巖下梅瘦若松上鶴時聞九臯唳孤響振雲壑仙  
籍登玄都文藻通紫閣詩魂不可招荒雲雨苔剝

傅子初

柴門對青山茅屋俯流水伊吾夜無眠寒燈墮紅蕋聲  
名一朝振車馬動閭里書臺悽暮烟過客猶仰止

蘇平仲

眉山文獻源後裔稱傑作垂雲九苞鳳瑞世麟一角乘  
運登禁林雄筆振臺閣荒隧誰招魂悲泉咽雲壑

魯志敏

魯山堆月場苦竹蔭清樾茅屋哦春風衡門臥寒雪高  
義磨層空妙句追往哲平生憂國心泣涕屢陳策

朱原立

門對箕山雲喬木蔭桃李鄰曲誰往還鉛槧塵滿几馬



啼踏槐花捧檄為親喜古市今蕭條人稱紫陽里

劉子高

匡衡昔攻書繼畧鑿鄰壁短燭凝隙光流輝映絳帙苦  
力追正音漢魏深祖述落筆人爭傳文聲重千鎰

高李廸

闔閭門前樹烏啼華月圓詩吟倚樓上午鼓未成眠翠  
袖添琬鴨烏絲寫粉箋每懷經濟念鸞鏡感芳年

方方壺

蓬萊五雲宮金粉飾椒壁醉時臥氍毹酒醒灑墨汁傲  
世雙眼高鬼谷白雲濕玉堂寄書來落月夢相憶野鶴  
弔孤松衰螢照荒陌

黃季倫

折節委榮寵頓將生死齊秋荷補壞衲空林旅幽淒懸  
燈禮繡佛清齋烹露葵虎溪流古月自與遠公期

藍靜之明之昆季

清碧杜先生隱居武夷前朝以處士聘不起藍氏

昆李其門生也文翰英美青出於藍焉靜之隱處  
明之官至按察

徵君天下名書藏武夷曲金澗青出藍丹田白生玉棠  
棣馳英聲芝蘭播清馥桂林持節還高風振林谷

李燦然

書將五車讀少年觀國光龍池柳色綠官驛槐花黃賜  
衣照春色淡墨題秋香林塘遺故宅猶指鄭公鄉

葉楚庭

船頭酒百壺船尾書百冊閒騎桃花馬醉美西湖月狂吟捲秋濤聲撼扶桑折滄海無還期哀魂楚雲結

吳用晦

其祖月灣先生也

滄灣俯空寒老月懸古色殘花漂斷沼野徑繞荒宅王珣稱短簿牙笏猶故澤文藻遺江山蒼茫暮烟隔

題呂花園草堂朱雀橋

何處銷殘暑城南茅屋幽晚烟將野色春樹帶江流愛竹從兒種耽杯與婦謀生涯成老圃不是故時侯

郊居雜興東陳遂良

風雨人行少柴門午尚扃  
土花沿砌碧山果墜枝青  
病眼耽書癖衰顏托酒星  
經邦方尚武寂寞抱遺經

義城十二景其一曰烏石樵歌

烏石岡頭路林巒勝景開  
洲連青野濶山俯碧溪迴  
墨沼春生草書堂雨蔭苔  
樵歌時出谷野興屢登臺  
自得園廬樂生涯不用媒

花橋釣艇

花橋通駟馬錦里昔鳴珂紅雨桃飄浪青絲柳蘸波石  
欄晴更倚釣艇暮還過魚暖金翻藻鷗涼白宿荷先賢  
多勝賞落日一漁蓑

魯壇古市

洙泗流波遠尊崇百代同衣冠循習氣俎豆想餘風市  
廢殘槐綠壇虛笑杏紅壤垣迷古鐸宿草臥懸鐘文沼  
今更化絃歌幸歲豐

雙溪明月

月照雙溪水春流燕尾又光移船舵轉影落釣絲斜壁  
彩澄鷗渚金波漾雁沙扣舷清不寐浩興欲乘槎

萬斛晴雲

萬斛雲姿秀巖棲伴古松尚橫秦嶺態猶帶楚臺蹤林  
碧晴縈絮天青晚作峰也曾閒出岫上下逐飛龍

東閣書聲

草閣深絃誦吾伊徹夜分鄰雞銷夕漏簡蠹護香芸山  
鬼吹燈聽溪僧隔竹聞斷機遺訓在秋夢落青雲

得漢彘簡周伯寧索香灰

古彘多歎識蟠螭漢篆存黃金銷土色翠羽飲雷文綺  
席流寒月銀屏度綵雲蘭灰能裹寄長吟盡夜分

聽雨堂為安成周氏賦

中年迫宦遊邈若胡與越悠悠烟樹遙杳杳關河絕況  
茲風雨夕坐想鴻雁隔荒墳寧共理孤燈耿還滅懷寶  
重經濟括囊貴明哲何時對牀眠慰此腸內熱

敬軒詩為王達善賦



深巷何窈窕端居掩柴荆素心每無欲寡朴輕浮榮處  
盡默自守神清淡忘形危坐白日晚踈林微雨晴開窗  
幽鳥啼滿堦芳草青焚香奏絲桐愛此塵纓清孤雲野  
鶴唳絕壑流泉鳴高懷曠而婉雅音誰復鳴古人良已  
久寸心千古情

題蘇子卿牧羝圖

穹廬十九年坐臥持漢節歸來兩鬢斑疑帶天山雪

寒食客秦淮憶舊

去年寒食長途客  
桃花落盡梨花白  
今年寒食客秦淮  
杏花李花無數開  
東風凋殘白羽箭  
落日獨倚黃金臺  
緇塵蕭騷吹病目  
破帽烏靴泥漉漉  
藜杖東山弔謝安  
悵望飛雲仰天哭  
淒涼心事更誰憐  
絲絢可以調絲絃  
子期已矣伯牙死  
高山流水空荒烟  
王孫不歸芳草暮  
解衣沽酒驅愁去  
誰言一醉可消愁  
酒入五腸肝膽露  
便擬揚帆析木津  
仍期掛劍扶桑樹  
志士長懷溝壑憂  
功名百歲等浮漚  
雨晴浪煖河豚上  
載酒滄江弄釣舟

題諸葛武侯廟

武侯古廟臨江市碑仆苔荒字殘廢巴東巴西巫峽長  
父老至今來拜祭木牛流馬將何施君才十倍當曹丕  
託孤付國寄大事輔不可輔卿為之股肱竭力誓臣節  
五月渡瀘親出師君臣氣義出肝膽千古淚落令人悲  
江流不盡潮聲咽嗚呼遺恨三分國沙際空遺八陣圖  
蒼梧雲暝秋蕭瑟

題崑崙雪曉圖

自有宇宙便有此山六丁智力憚疏鑿一氣神秀鍾嶠  
屹九龍上蟠日月麗六鰲下鎮滄溟寒西母雙鳬遠莫  
至周王八駿遙難攀萬仞皚皚太古雪大明中開爛銀  
闕玉京瑤圃恍瀛洲一洗胸中煩惱熱自非砥柱障狂  
瀾大地蒼生混魚鼈摩挲此圖雙眼開令我胸次生崔  
嵬安於磐石奠四海長歌萬里大風來

過南湖嘴

城頭開船北風起帆輕直過南湖嘴上水歡呼下水嗟

龍王廟前淮燒紙小婦扳曾楊柳磯淮鹽換得鰕魚肥  
沽來新酒不成醉臥聽鄰船歌竹枝

宿潯陽

潯陽城頭秋雁啼霜寒木落紅霏霏孤舟晚泊日當酉  
纜繫石橋楊柳磯庾樓基廢迷烟樹猶記樓船爭戰處  
草店蕭條野客酤女牆依舊官軍戍逝水滔滔送落暉  
繁華雲變不勝悲當年司馬青衫淚翠袖琵琶夢已非

題賈文彬耕樂堂

前年戍醺口關去年來利陽鎮花陰臥犬喜官閒沙際  
飯牛饒野興江村寒食落花初水滿平田宿雨餘凝塵  
懶拂鵬翎箭負米歸來讀夜書

耕讀生涯為子昇弟作

杏花開時啼乳鳩平野雨霽青烟浮稚兒呼犢催蓐食  
長簑短笠登西疇布穀村南聲逐逐勸人種苗食新穀  
蛙聲知歲卜田頭龍骨聲閒臥沙曲九農鼓腹喜年登  
擺耜連雲欣歲熟草堂低接榆柳牆柴門半掩歸牛羊

溪虛笛弄夕陽晚木脫風高秋露涼窗下移燈把書讀  
老翁燃松當短燭但願官家徭役平雞黍年年會鄰屋

棲碧軒為陳指揮賦

瑣窗斜隔紅塵道芳草滿簾晴不掃堦前馬踏杏花泥  
柳外鶯啼春色好羅袍犀帶紫金魚壁上瑤琴牀上書  
雲挾城頭春雨過一庭脩竹讀陰符

題滕王閣

珠簾畫棟當南浦岸草汀花幾今古九江潮白雁橫秋

五老雲青龍出雨浩蕩淡波去莫回淒涼唐室不勝哀  
空遺王勃文章在父老扁舟奠酒來

題趙文敏公墨竹為宋景濂學士賦

坡翁老可俱已仙誰寫石上青琅玕淇園蕭條白日晚  
渭水寂寞西風寒歸來三徑無人共翡翠參差涼露重  
瀛海終期釣六鰲緱山自擬棲雙鳳八月秋高夜向沉  
長梢髣髴生清陰千尋楚水三閤操萬里天山屬國心  
洞庭冥冥波浪急模糊爪甲蛟龍蹟悵望天涯翠袖愁



一片湘雲淚痕濕

大梁行

大梁繁華全盛日宮闕浮天耀桃李魏國山河十萬兵  
信陵賓客三千履上苑春晴花覆闌關雞走馬事金鞍  
銀燭填街美人過紫蓋凌雲公子還五侯七貴行人避  
吐膽傾肝論意氣朱亥能移晉鄙兵侯嬴自執夷門轡  
回首英雄非昔時輦路人稀秋草迷舊遊歌舞今何處  
落日狐狸當樹啼

潯陽行

江頭女牆啼野鳥，亂石如壘驚濤呼。  
潯陽九派控吳澤，匡阜千峰迴楚墟。  
當時形勝夸疆土，連雲宮苑旌旗樹。  
庾亮樓船赴國仇，鯨王版籍歸英主。  
盛年一去水流東，冠蓋繁華處處空。  
兩岸蘆花浸明月，滿汀烟樹鳴秋風。  
古戍何人晚吹笛，客船莫向城邊繫。  
翠袖琵琶夢已寒，青衫易灑天涯客。

荊州護衛指揮陳公伯英鞍馬之暇焚香吟詩

高懷雅量令人起敬賦詩承教

將軍少年英氣豪學劍論兵談六韜  
龜紋璪甲紫絲轡  
虎皮鞍韉紅錦袍三尺雕弓兩斛力  
八歲龍駒雙佩刀  
不憤旄頭如火赤從駕南征破戎狄  
鴻雁啼霜瘴月昏  
駱駝載雪狼烟濕羽檄流星烽火連  
塞旗誓欲靜三邊  
銜枚榆塞金瘡苦洗箭沙泉戰血羶  
柳營日落鳴笳鼓  
玉帳籌邊月當午酒壓葡萄壯士歌  
花插真珠美人舞  
奏凱歸來拜玉墀天恩頒宴畫樓西  
漢家未數蕭曹業

麟閣丹青姓字題

遊丹青閣

橋南楊柳綠成行  
出郭尋僧到上方  
城拱烟霞開錦繡  
山圍松竹奏笙簧  
半簾晚翠涵溪閣  
一枕秋雲護石牀  
安得遠公同淨業  
白蓮池上挹天香

丁卯立春日簡蔡宗文昆季

玉琯吹葭已應灰  
字題春帖手斜裁  
震司木德三陽泰  
律協條風一氣回  
鸞輅憶陪趨御苑  
燕釵曾賜出宮醅

文園多病歸田早  
鬢影東風看野梅

簡戴彥碩

故人營得草堂低  
老圃連城近市西  
碧注硯池荷葉露  
紅粘屐齒杏花泥  
書懸牛角朝耕地  
飯飼魚苗晚灌畦  
只恐長安雲路近  
馬蹄催夢聽朝雞

呈西平侯沐都督西征

西虜憑陵久不賓  
詔書五道出將軍  
龍光燭劒銷邊祿  
虎氣揚旌壓陣雲  
周廟昔聞方叔頌  
漢廷今見貳師勦

春風三月鶯花禁歸騎笙歌奏凱聞

早春呈吳待制

上林春早陌塵香紫禁觚稜射日光  
新綠御河搖柳黛  
小紅宮樹試桃妝  
山連曉氣蟠龍虎  
臺枕東風憶鳳凰  
心折故園幽興獨  
尋僧看竹過鄰牆

寄賈文彬巡檢

故人一別動經春  
野渡維舟送夕曛  
銀燭照窗秋聽雨  
角弓懸壁晚看雲  
山城旗影中流見  
草閣書聲隔岸聞

江漢茫茫多舊識，猶能俎豆說將軍。

與子昇弟觀捕魚

柳條風脆已梳黃，湖落江空石露梁。  
帆脚壓霜寒殺網，柁牙移月夜鳴榔。  
載車有獵曾占渭，鼓枻無歌豈濯湘。  
又得錦鱗長尺半，鄰翁新酒正吹香。

徐叔度黃子初王仲愚同宿徐彥輔齋次韻

草堂不厭客過臨，清暑銷塵帶石林。  
溪靜白鷗晴泛影，樹幽黃鳥晚留音。  
綺窗分榻簾陰轉，銀燭移樽漏滴深。

向秀不堪鄰笛感墓亭秋思易傷心

寄表弟朱永容永實昆季

渭陽河畔畫樓西紅粉闌干柳樹齊窗底折花騎竹馬  
街頭籠草關山雞銀屏褥隱鴛鴦並綺戶香凝翡翠棲  
回首繁華成舊夢對牀今雨不堪題

過蕪城懷古寄程伯羽劉子雍胡伯清

珠簾十里瓊花月惟見荒城背夕曛潮落邗溝迷廢壘  
樹連瓜步帶殘雲雄文猶記陳琳檄故苑空遺煬帝墳



書劍昔曾趨幕府白頭應愧鮑參軍

姑蘇懷古

城枕姑蘇笠澤西垂虹橋接草烟迷闔閭古墓騰金虎  
勾踐空營失水犀抉目樹荒羣鹿走捧心臺廢亂鴉啼  
館娃香逕歌遊處響屨廊空落燕泥

過錢朝陽故居有感東程伯羽汪宗彞

短牆依舊草堂深蘭徑重過思不禁芍藥紅殘花漂雨  
甘棠綠嫩樹成陰帖臨青李池遺墨曲奏朱絲壁憶琴

回首風流陳迹冷山陽鄰笛淚沾襟

俠氣

中年俠氣未全消通籍金閨躡紫霄龍尾趨班晨漏轉  
螭頭簪筆晚香飄柳迷輦路迂瓊佩花壓宮牆度綵簫  
報國自慚衰朽質經秋歸夢到漁樵

拜外舅陳公禹謨墓東陳原輔

貳館東風憶昔年笙歌如沸酒如泉麒麟錦帳銷銀燭  
孔雀雲屏列玳筵井塌銅瓶渾臥雨香闌瓊佩已迷烟

傷心孤塚楓林外寒食殘花墮紙錢

和九日韻寄朱見中二首

野樹荒臺帶晚陰昔年歌舞憶登臨桃花紈扇西風冷  
蔓草銅駝夕露深舊夢青雲連館閣多情華髮老山林  
江南庾信傷秋倦踈雨簷櫳怯暮砧

憶從天上宴黃花烏帽秋歌鬢影斜宣賜絲壺香注蟻  
醉簪宮筆墨塗鴉雲連雉尾開金闕日射鑾輿引翠華  
退食從容休沐早短屏驚雨夢還家

次秋日韻奉汝弼叔

三徑歸來菊未荒  
半凋楊柳弄初涼  
銀屏紈扇題秋句  
金鴨羅衣換夕香  
老憶風雲趨北闕  
夢無花月待東牆  
狂遊尚記秦樓別  
翠袖紅綃拭淚行

送春寄楊孟瑄

腸斷春光春可憐  
登山臨水送將行  
天連草色圍孤嶂  
樹帶河流遶故城  
幾點落紅迷蝶影  
一庭新綠占鶯聲  
殷勤更約明年早  
酒對陽關慰別情

題葉楚庭醉漁卷簡彭敬宗劉子厚子明二首  
落盡茶蘼草覆裯二分流水一分塵小車都載鵝黃酒  
蘇小墳前醉過春

渴眠蓬底口涎流翹蘂為池槽作丘便向五湖成浪死  
墓題應得醉鄉侯

京口中秋

歸棹前年酒滿缸牽衣稚子慰離腸却憐月色連秋色  
依舊他鄉憶故鄉

題舅氏亭簡朱原立陳遂良陳原輔

渭陽池館花如霧曲曲闌干面面池記得少年遮妓飲  
至今楊柳學腰肢

暮春寫懷二首

揚州書記鬢蒼蒼每向春歸欲斷腸刺欲典衣沽酒飲  
風流無復少年狂

青梅煮酒蕨芽肥倦客懷家入夢思想得故園風景好  
一庭香雪落茶縻

待渡溪澣因憶辛卯五月廿五日實先祖母誕  
辰時家宴彌旬名妓陳巧兒樓船將還諸兄  
飲餞張宴設樂管絃竟夕今轉盼三十五年  
矣念少年紅香翠夢俯仰之間風流雲變華  
屋丘山寒烟蔓草春風如昨痛諸兄不可復  
作予髮亦種種焉感今悼昔不勝其情賦詩  
以寫懷

畫船曾駐渡頭西翠黛凝歌憶送歸今日不堪重繫纜

滿汀烟樹昔人非

繁華雲變都非舊一片寒沙臥夕陽惟有壞垣春雨裏  
野花猶似美人妝

予舅氏朱民俊會心憩老二亭幼時往還必預  
宴賞今已荒棘重來有感柬朱容允寶

憩賞亭西多牡丹年年攜酒向春看于今池館都非昔  
野燒凝烟暮雨寒

石倉歷代詩選卷三百六